

Bon Dia

Dialuna, 25 de April, 1994

Deporte



Impresionante apertura di Compleho Deportivo Guillermo P. Trinidad



ORANJESTAD

Diasabra último a tuma lugare tan sperá apertura di e Compleho Deportivo Guillermo Próspero Trinidad. E compleho deportivo aki ta uno sumamente moderno cu tin facilidad pa practica futbol y atletismo.

Riba su mes e ta un joya cu ta ponebo pensa cu ta den un stadion na Hulanda of na otro país caminda nan ta hunga futbol riba yerba, aunke cu e

único diferencia ta cu akinan e yerba ta artificial y ta haci calor, mientras cu na Hulanda e yerba ta di verdad y ta haci frieuw.

Sin duda e compleho deportivo aki lo sirbi pa mehora futbol, cu ta cayendo den un decadencia formal, mientras cu pa loka ta atletismo, esaki ta un empuhe mas ya cu e deporte aki ta riba un progreso total.

Un inversion di ocho milyon Florin, cu awor tur Arubano por disfrutá di dje tanto como

fanaticada como deportista mes.

Diasabra e programa a cuminsa pa un cuarto pa sheite, caminda tabatin e actonan oficial di develo di e placa cu e nomber di e compleho deportivo y un placa cu e cara di Sr. Guillermo Próspero Trinidad na kende e stadion nobo aki a wordo dedicá. Apesar cu tabatin transmision di TeleAruba hopi persona a acudí p'asina disfrutá di e compleho deportivo aki cu sin duda ta dunabo e gana pa bin

wak partidonan di futbol y competencianan di atletismo.


E programa tabata uno caminda e público por a mira competencianan di atletismo, cualnan despues di hopi tempo ta wordo mirá atrobe den e forma aki, esta riba un pista di atletismo profesional, y di algun partidonan di futbol riba e yerba artificial.

Kizas un punto negativo di henter e programa di apertura aki ta cu e programa mes a dura hopi ya cu tabatin

demasiado cosnan hincá tras di otro, cu pa esnan cu a presenciá e apertura aki y kendenan a bin pa mira e seleccion U-20 di Aruba enfrentá esun di Trinidad and Tobago, esaki tabata un eternidad.

Riba e foto por mira d.r.p.d. Sr. Kenny Thijsen, presidente di Fundacion Lotto pa Deporte, Sra Vuida Francis Kelly Trinidad, Promé Minister di Aruba, Sr. Nelson Oduber, y Sr. Atan Lee.

Formidabel apertura di Compleho Deportivo Guillermo Trinidad



DAKOTA-Un bista gráfico di e apertura oficial di e Compleho Deportivo Guillermo Próspero Trinidad Diasabra anochi. Un público grandi a presencjá e apertura aki caminda a asisti tambe figuranan prominente di casi tur sector di comunidad. Ban spera cu esaki ta comienzo di un era nobo y grandi pa deporte local. □